


MENDRANZES

La Conferenza à aproà i contribuc de la PAT

Te na curta scontrèda online ladins, mochegn e zimbres à dat l'parer sui intervenc per l'editoria e l'informazion e su la spartijon del Fondo per la mendranzes de la PAT per l'an 2023



N moment de la Conferenza de la mendranzes metuda a jir online.

La é stata dassen curta chest'outa la Conferenza de la mendranzes, endrezèda online en lunesc ai 16 de jené. I raprezentanc istituzionèi e culturèi de la comunanza mochen, zimbra e ladina é stac chiamé ite dal Servije mendranzes de la Provincia de Trent per dèr l'parer, che l'é de obligh, sui intervenc per l'editoria e l'informazion e su la spartijon del Fondo per la mendranzes de la PAT per l'an 2023.

Do l'salut de la dirigenta del Servije Giuliana Cristoforetti, l'é stat l'assessor a la cultura Mirko Bisesti a tor su l'ruol de president de la Conferenza al post de Fugatti, portan l'salut del President de la jonta del Trentin che era impegnà a Roma. Bisesti à rejonà de l'atenzion del goern provincièl envers la mendranzes e l'à prejentà en curt la scomenzadives en program a livel generèl che vegn finanzièdes da la Provincia col Fondo de la mendranzes che l'é de 738 mile euro.

Per chel che vèrda l'Pian de l'informazion, che perveit en dut na soma de beleche 400 mile euro, la dirigenta Cristoforetti à uzà fora la neva che con chest an 2023 duc i finanziamenc trentins per La Usc di Ladins vegn dac da la Provincia de Trent diretamente a l'Union Generela di Ladins dla Dolomites, senza passèr per l'Comun General

e l'Union di Ladins de Fascia descheche l'era ti egn passé. Da la PAT per La Usc l'é stat aproà n contribut de 103.519 euro, su na speisa ametuda de 139.400 euro: 13.000 euro de più respet al an passà – à sottrissà Cristoforetti. Chest permet de paèr la produzion (giornalista e colaboradores) e la speises de stampa e distribuzion per la pèrt de Fascia.

Per chel che vèrda i ladins na soma de 160.800 euro va enveze diretamente al Comun General de Fascia per l'Pian de l'informazion, che tol ite duta l'otra ativitàedes de stampa e editoria e la trasmiscions per ladin da manèr fora a la radio e televijion e sui social.

L'president de l'Union Generela di Ladins de la Dolomites Antone Pollam à recordà l'emportanza de La Usc di Ladins, soul sfoi che tegn ensema duc i ladins de Trentin, Südtirol e Soramont, despartii acà 100 egn dal fascism, l'à domanà che ence la Provincia de Trent ge dae sie sostegn ai ladins storic de la Provincia de Belun e l'à anuzià che chest'aisciuda l'Union Generela di Ladins metarà a jir n convegn tel cedeàn de la spartijon, per recordèr la storia e vardèr al davegnir.

Lucia Gross